

Wachakalcarta, Pablo lelpox, Timoteoliajwa

Pablo lelpox carta Timoteoliajwa

1 Xan, Pablo, Dios namakafit Jesucristo pej-apóstolliajwan, jiw naewuajnalijwan Jesús pejwuajan. Dios nejxasink xan jiw naewuajnalijwan Dios jum-aechpox, naexasiti Jesús pejwuajan duilaliajwa japonxotse. **2** Timoteo, ampxox carta lelx xamliajwa. Xam taxuɫnam wut, ja-am xanliajwa, xambej naexasitam xot Jesús pejwuajan. Samata, xam nejxasinkax. Xan waj-ax Dios, wajpaklon Jesucristobej, kawuajna xam kajachawaesliajwapi. Japi kawuajna xambej xam chiekal beltaeliajwa. Japi kawuajna xambej xabich xam kajachawaesliajwa chiekal dukaliajwam, asew jiw suapich.

Pablo Timoteo naewuajanpox, japon kofs-elaliajwa Dios pijax bichax

3 Me-ama tajwuajnapijiw nabist Diosliajwa, xambej ja-an amwutjel. Ja-an wut, xan babijax is-enil asew jiwliajwa. Matkoi, madoibej, Dios kawuajna xam wut, xam nejchaxoelx. Samata, jawut Dios gracias-an xamliajwa. **4** Xan nejchafaetx xam nowampox, xan chijyaliajwan wut asalel. Samata, pejme xam taesian nejchachaemlaliajwan. **5** Xan nejkiowa-enil xam Jesucristo pejwuajan chiekal naexasitampox. Nej-ae' Loida matxoela naexasit Jesús pejwuajan, nej-en Eunice suapichbej. Xan matabijtax, xambej diachwuajnakolax naexasitam Jesús pejwuajan.

6 Samata, jxam nejchaxoelde Dios pijax bichax isfulaliajwam! Xan nejta'tat ki-otx wut Dios kawuajnalijwan, jawut Espíritu Santo tuadut xam kajachawaesfulaliajwa Dios pijax bichax isliajwam. **7** Dios to'ak Espíritu Santo xatis wajmatruatanxotaliajwa. Samata, wajlewlixil asew jiwliajwa.

Espíritu Santo nakkajachawaet isliajwas Dios nejxasinkpoxan. Nakkajachawaetbejpon asew jiw nejxasinkaliajwas. Nakkajachawaetbejpon babijaxan isasamatas. **8** ¡Xam nabej nadale' asew jiw naewuajnalijwam wajpaklon Jesús pejwuajan! ¡Nabej nadale'bej xan jiw jebatat najiapoxliajwa, jiw naewuajnax xot Jesús pejwuajan! Nabijatam wut, asew jiw is wut babijaxan, Jesús pejwuajan naewuajnam wut, ja-am wut, ¡nakiowa naewuajnafulde! Ja-am wut, Dios kajachawaesfulaxael xam mamnikaliajwam, me-ama xan Dios nakajachawaesful. **9** Dios nakbu'wia xatis. Nakmakanotbejpon japon pejjiwaliajwas tanbichliajwas. Dios nakmakanos-el, pachaempoxan isas xot. Pe japon nakmakanot, pajut nejchaxoel xot, xatis naknejxasink xoton. Chajiakolaxtat Dios is-el wutfuk ampathat, Dios nejchaxoel to'aliajwa Jesucristo ampathatpijiw bu'weliajwa. **10** Wajpaklon Jesucristo ampathatat nalaelt. Do baxael, japon boesas tupaliajwa xatisliajwa. Japon tup wut, Dios mat-echpon pejme dukaliajwa. Ja-aech wut, Jesucristo malecha patupax. Jesucristo tup wut xatisliajwa, matabijas Dios xabich naknejxasinkpox. Jiw matabija wut chimiawuajan, Jesús pejwuajan, japi matabijaxael pomatkoicha duilaxaelpox Diosxotse.

11 Dios nato'a xan jiw naewuajnalijwan Jesús pejwuajan. Dios namakafitbej Jesús pej-apóstolliajwan, jiw naewuajnax wut chiekal chanaekabuanaliajwanbej japon pejwuajan. **12** Samata, asew jiw pijaxtat amwutjel xan nabijatax jiw jebatat. Pe nakiowa, tadala-el, matabijtax xot Jesucristo, xabich xanaboetaxpon. Matabijtaxbej japon pomatkoicha xan natataeflaxaelpox, jiw naewuajnalijwan japon pejwuajan.

13 Samata, ¡chimiawuajan, Jesús pejwuajan, chiekal naewuajande, majt xam naewuajnaxpox! Me-ama xam naewuajnax wut, ¡ja-amdebej, asew jiw naewuajnam wut! ¡Pomatkoicha Jesús pejwuajan chiekal naexasisfulde! Xatis Jesús pejjiws xot, ¡nakaewa chiekal nanejxasinkaxaesbej! **14** Dios to'a xam jiw naewuajnafulaliajwam chimiawuajan, Jesús pejwuajan. ¡Japawuajan nabej xaliaxe' asawuajantat! Espíritu Santo, xatis wajmatpumatxotpon, japon xam kajachawaesfulaxael japawuajan xaliaxsasamatam.

15 Xam chiekal matabijtam ampox. Xan jiw jebatatax wut, puexa Asia tuajnuapijiw, naexasiti Jesús pejwuajan, japi chajia nakofaliajwa. Kaes nawultatae-ellisi. Xanxot chajiapixot

ampilape. Kaen pawul Figelo. Asan pawul Hermógenes. **16** Xan Dios kawuajna x Onesíforoliajwa, japon pejjiwliajwabej, Dios kajachawaesliajwas. Xan jiw jebatatax wut, japon kaen xabich nataent. Japon padala-elbej xan nataentaliajwa. Japon nataent wut, xan xabich nejchachaemlax. **17** Japon Roma paklowaxxot pat wut, damlathula-elon. Kamta nawulwekaxenton nafaenaliajwa. Do baxael, nafaenpon. **18** Xam matabijtam, japon xabich nakajachawaet, xan Éfeso paklowaxxotx wut. Samata, Dios kawuajna x japon xabich kajachawaesliajwas, asamatkoi Cristo pejme pask wut.

Machiyaxaelpox Jesús pejwuajan naexasiti, nabist wuti Jesúsliajwa

2 Wua, Timoteo, Jesucristo xam kajachawaet xot, ¡mamnikde Dios pijax, bichax, chiekal nabichliajwam! **2** Xam chiekal jumtaenam xabich jiw pejwuajnalel xan naewuajna x wut. ¡Japanaewuajna x lap xam asew jiw naewuajande, japi jiw, matabijtampi, chiekal xajuppi naewuajnalialjwa asew jiw japanaewuajna x!

3 Xam nabijasaxaelam asew jiw pijaxtat, nabistam xot Jesucristoliajwa. Soldawan nabijat wut, nakiowa nabeful. Bojtaliatbejpon. ¡Xamlap-is ja-amde, nabijatam wut Jesucristoliajwa! **4** Soldawan wuajna wet isliajwa pejpaklon to'aspoxxal. Pajut isasiapoxan isaxilon. **5** Najaesaxaelpon kanaliajwa premio, jachiyaxaelbej. Japon aton chiekal naexaxisaxaelbej to'aspoxx najaesliajwa. Najaesaxaelpon chiekal naexaxis-el wut, ja-aech wut, japon aton premio kanaxil. **6** Nabistpon pejlul, jachiyaxaelbej. Xabich nabistpon. Pe baxael, chiekal weti'tas wut, wepachaems wutbej, jolaxaelon pajutliajwa, pejbichax chiekal is xoton. **7** Samata, xam nejchaxoelam wut, ¡chiekal nejchaxoelde japoxanliajwa! Ja-am wut, Dios kajachawaesaxael puexa chiekal matabijsliajwam.

8 Xam jiw naewuajna x wut, ¡nejchaxoelde Jesucristo, Dios mat-echpon pejme dukaliajwa, japon rey David pamon! Xan jiw naewuajna x japon pejwuajan. Japi naexasit wut japawuajan, Dios bu'weyaxaespi. **9** Xan nabijatax, asew jiw najia xot jiw jebatat, Jesús pejwuajan jiw naewuajna x xot. Cadenamuatat namuaxwasixawaet. Me-ama babejna x wut, naki-aechpi. Pe Jesús pejwuajan chinax kaen aton xawaesaxil cadenamuatat.

Samata, Jesús pejwajaan xabich potuajnucha xajur. **10** Xan japox matabijtax xot, boejtaliatx, nabijatax wut, Dios makanochpi, japibej naexasisliajwa Jesús pejwajaan. Samata, japi jiwbej b'weyaxaes, Jesucristo pejwajaan naexasit wut pomatkoicha duilaliajwapi Diosxotse.

11 Diachwajaanakolax himnotat jum-aech wut, jum-aechox:

“Xatis, Cristo suapich, tups wut, xatisbej duilaxaes Diosxotse, Cristo suapich.

12 Asew jiw pijaxtat nabijatas wut, boejtaliasaxaes. Jatis wut, xatis, Cristo suapich, Diosxotse tato'laxaes. Xatis jumtis wut asew jiwliajwa: ‘Xanal Cristo pejjiwa-enil’ —tis wut, Cristobej asamatkoi xatisliajwa jumchiyaxael: ‘Ampi, jiw, tajjiwa-el’ —chiyaxaelbejon.

13 Xatis wajut jumduwspox is-esal wut, Cristolax isaxael nakjumdutpox xatisliajwa. Cristo asanejchaxoelaxa-el, jum-aech wut” —aech himnotat.

Ma-aechpox aton, japon chiekal nabist wut Diosliajwa

14 Xan ampox jum-an wut, Dios chiekal matabijt. ¡Xam jiw chiekal naewajaanafalde japi nejchafaekaliajwa, kaes nakaewa nabunlos-elaliajwa asaxan, pachaema-elpoxan! Japi nakaewa asaxanliajwa nabunlot wut, japox chinax pachaemaxil. Asew jiw japox jumtaen wut, naexasisaxili Jesucristo pejwajaan. **15** ¡Jiw naewajaanande diachwajaanakolaxwajaan, me-ama Dios xam to'a! Ja-am wut, asamatkoi xam nadalaxil, Dios pejwajaanalel nukam wut. Ja-am wutbej, Dios nejchachaemlaxael xamliajwa. **16** Jiw naewajaanaximil Dios pejjamechana-el wut, japanaewajaanax pachaema-el xot. Asew jiw japox naewajaan wut, japi jiw xabich tabejt asew jiw, Dios xanaboejapi. **17** Japi naewajaanpox, me-ama b'xaxaeflawaxae wut, ja-aechox, xabich asew jiw tabejt xot. Himeneo, Fileto suapich, japibej tabejt asew jiw, naewajaan wuti Dios pejjamechana-elpox. **18** Japi kolenje kofa Dios pejjamechan, diachwajaanakolaxwajaan. Asbuan jumch jum-aechi, asew jiw naewajaan wut: “Xatis, Jesús pejwajaan naexasichpis, Dios nakmat-eyaxaelpox pejme duilaliajwas, japox toeplixox. Samata, Dios kaes xatis nakmat-eyaxil pejme duilaliajwas” —aech japi jiw, asew jiw naewajaan wut. Samata, jiw, japi majt naexasiti Jesús pejwajaan, amwutjel chiekal matabija-el achawajaan kaes pachaem naexasisliajwapi. **19** Diachwajaanakolax Dios

pejjamechan xaliaxaxil. Japon pejjamechan, chajia lelsprox, j̄m-aech w̄t, j̄m-aechox: “Wajpaklon matabijt pejjiw” —aechox. J̄m-aechbejprox: “Puexa jiw j̄m-aechpi: ‘Xanal Cristo pejjiwan’ —aechpi, japi jiw kofaxael babijaxan isproxan” —aechbej Dios pejjamechan, chajia lelsprox.

20 Pinjiyax batutat chalak oroplatfachan. Chalakbej plata-platfachan, fiestamatkoi w̄t, japaplatfachantat jiw xaxaeliajwa. Japabatutat chalakbej platfachan isaspi naechantat, b̄x-astatbej, nejmachmatkoi w̄t japaplatfachantat jiw xaxaeliajwa. **21** Jachiyaxaelbej jiw, naexasitpixot Jesús pejw̄ajan. Asew jiw chiekal kaelel kofa babijaxan isproxan. Ja-aech w̄t, chiekal isf̄l Dios pejbichaxan. Samata, xaj̄p isliajwa nejmachpachaempoxan.

22 Timoteo, j̄xam pomatkoicha chiekal taem babijax isasamatam, me-ama asew, pansiachow, isf̄l babijaxan, jachisamatam! j̄Xamlax isf̄lde pachaempoxan! j̄Chiekal xanaboejsf̄ldebej Cristo! j̄Chiekal nejxasinkdebej asew jiw, naexasiti Jesús pejw̄ajan! Dukam w̄t, j̄chiekal dukdebej! j̄Jamde asew jiw, naexasiti Jesús pejw̄ajan s̄wapich, japi jiwbej chiekal pachaemaliajwa Diosliajwa! **23** Xam matabijtam. Jiw nalot w̄t, japi nakaewa nanejwesla. Samata, xam, asew jiw s̄wapich, j̄nabej nab̄nlos w̄ajan, pachaema-elw̄ajan! **24** Xatis nabistaspis Jesúsliajwa, nalosaxisal, asew jiw s̄wapich. Asb̄an j̄mch chiekal pachaemaxaes asew jiwliajwa. Chiekal matabijaxaesbej Dios pejjamechan jiw chanaekab̄analiajwas. Piach wajjalaxilbej, asew jiw babejjamechan j̄m-aechf̄l w̄t xatisliajwa. **25** Chiekal naew̄ajnaxaes asew jiw, Dios naexasis-elpif̄k. W̄ajnwesaxaes asamatkoi japibej Dios kajachawaesliajwas naexasisliajwapi Dios. Naexasit w̄ti Dios, jaw̄t chiekal pajut matabijaxaeli Jesús pejw̄ajan, diachw̄ajnakolaxprox. **26** Ja-aech w̄tbej, japi pajut matabijaxael chiekal nejchaxoela-elprox Dios pejjamechanliajwa. Japi naexasit w̄ti Dios, ja-aech w̄t, nadijaxaeli Satanás tato'alxot. Ja-aech w̄tbej, pajut chiekal matabijaxaelbejpi majt Satanás naekichachajbasprox, japi isf̄l w̄t Satanás nejxasinkproxan.

Machiyaxaelprox jiw, mox paw̄ajna w̄t ampathat toepaliajwa

3 Timoteo, xam chiekal matabijsaxaelam amprox. Mox paw̄ajna w̄t ampathat toepaliajwa, puexa jiwliajwa

xabich chachoelaxael. Matkoiyan xabich chaemilaxaelbej japi jiwliajwa. **2** Japamatkoiyantat jiw nejchaxoelaxael isliajwa pachaempoxan pajutliajwakal. Japi jiw xabich nejchaxoelaxaelbejpi kimaeyax. Nejchaxoel wut, jumchiyaxaelbejpi: “Xatis kaes pejme pachaems. Me-ama asew jiw, jachi-esal” —chiyaxaeli, nejchaxoel wut. Jumchiyaxaelbejpi babejjamechan Diosliajwa. Naexasisaxilbejpi paxjiw, penjiwbej, tato'laspoxan. Asew jiw kajachawaech wut, graciaschiyaxilbejpi. Sitaeyaxilbejpi Dios. **3** Nejxasinkaxilbejpi asew jiw. Buxwujajanmaenkaxaelbejpi. Kofaxilbejpi babijaxan ispoxan. Japi asew jiw ba wut, beltaeyax chiekal wejisal. Nejweslaxaelbejpi jiw, pachaempoxan ispi. **4** Japibej woeyaxael pejnachala padaelmajiwxot. Isaxaelbejpi babijaxan pajut isasiapoxan. Japibej naewesaxil, asew jiw naewujajnas wut, pajutliajwa nejchaxoel xot: “Xatis kaes pejme matabijas. Me-ama asew jiw, jachi-esal xatis” —chiyaxael xoti, nejchaxoel wut. Nejchaxoelaxaelbejpi pajut nejxasinkpoxan isliajwa. Ja-aech wut, nejchaxoelaxili isliajwa Dios nejxasinkpoxan. **5** Japi jiw pajutliajwa najumchiyaxaelbej asew jiwliajwa: “Xanalbej chiekal naexasitx Dios” —chiyaxaeli. Pe japi isaxael babijaxan. Ja-aech wut, puexa jiw matabijaxaesi japi Dios naexasis-elpi.

Jiw ja-aechpi, xam nabej nachale', japi suapich! **6** Japi jiw asabachan low. Naewujajan wut japabachanpijiw, watho', naekichachajbapi. Japi watho', nejxaejwaspi, xabich babijaxan is xot. Ja-aech wut, nakiowa kaes pejme asaxan babijaxan isasia. Samata, tampoela-el naekichachajbaliajwas japi watho'. **7** Japi watho' matabijasia pajelnaewujajnas. Pe matabijaxili diachwujajnakolaxpox, japox xabich tampoel xot japiliajwa. **8** Japi poejiw nejxasinka-el naewujajnalialjwa diachwujajnakolaxpox. Nejchaxoelpi babijaxan. Naexasis-eli Jesús pejwujajan. Samata, japi poejiw, me-ama chajiakolaxtat Janes, Jambresbej, ja-aechi. Chajiakolaxtat Moisés naewujajan wut faraón, japi kolenje asbuan jumch buxtasalti Moisés, faraón naexasis-elalialjwa Moisés jum-aechpox, diachwujajnakolaxpox. **9** Japi poejiw, lowpi watho' pejbachantat, japi piach jiw naekichachajbaxil. Asamatkoi puexa jiw pajut chiekal matabijaxael, japi nejliaklapi. Me-ama chajiakolaxtat jiw matabija, Janes, Jambresbej, japi nejliaklapi, jachiyaxaeslap-is japi poejiw.

Pablo to'apox Timoteo, japon kaes jiw naewuajnalijwa

10 Timoteo, xam chiekal matabijtam, ma-an xan, jiw naewuajnax wut Jesús pejwujajan. Xam matabijtambej, ma-an xan, nabistax wut Diosliajwa, Dios chiekal nejchachaemlialijwa xanliajwa. Xambej chiekal matabijtam, ma-an xan, Dios chiekal naexasitx wut. Xambej chiekal matabijtam, asew jiw babijaxan is wut xanliajwa, xan talala-el japoxanliajwa. Xambej chiekal matabijtam, ma-an xan, puexa jiw nejxasinkax wut. Xambej najut chiekal matabijtam xabich boejtaliasfulaxpox. **11** Xambej najut matabijtam, ma-an xan, nabijatax wut, naewuajnax xot Jesús pejwujajan. Xambej puexa chiekal matabijtam xanliajwa ja-aechpoxan, Antioquía paklowaxxotx wut, Iconio paklowaxxotx wutbej, Listra paklowaxxotx wutbej. Japapaklowaxanxotx wut, japapaklowaxanpijiw pijaxtat xan xabich nabijatax, Jesús pejwujajan naewuajnax wut. Pe nakiowa, wajpaklon Jesucristo nakajachawaet weliajwan japapaklowaxanpijiwxot. **12** Puexa jiw, duilasiapi, me-ama Jesucristo nejxasink japi duilalialijwa, japi nabijasaxael asew jiw pijaxtat. **13** Jiw babejchowlex kaes babijaxan isaxael. Jiw naekichachajbapibej, asew jiw kaes naekichachajbaxael. Japibej asew jiw naekichachajbaxaes.

14 Timoteo, ¡xam nabej tapae' japi jiw xambej naekichachajbalialijwa! ¡Chiekal naexasisfulde matabijtam poxan! Xam chiekal matabijtam jiw xam naewuajanpi diachwujnakolaxpox. **15** Xam yamxulnam wut, matabijtam wut Dios pejjamechan, chajia lelspx, ja-am wut, matabijtam Dios xam bu'weyaxael pox, Jesús pejwujajan naexasitam xot. **16** Chajiakolaxtat Dios pejjiw, profetas, asew jiwbej, Dios kito'as lelialijwa Dios pejjamechan. Jawut, japi kaenanula lel wut, Espíritu Santo pijaxtat chiekal matabija lelialijwa. Samata, Dios pejjamechan xabich pachaem, chiekal naknaewuajnalialijwa xatis chiekal matabijalialijwas diachwujnakolaxpox naexasisliajwas. Dios pejjamechanbej pachaem xatis chiekal matabijalialijwas, masox naexasisaxisal. Dios pejjamechan xabich pachaembej kofalialijwas, babijaxan isas wut. Dios pejjamechan xabich pachaembej naknaewuajnalialijwa isliajwas pachaempoxan. Dios pejjamechan xabich pachaembej naknaewuajnalialijwa chiekal duilalialijwas. **17** Samata, Dios naexasiti chiekal matabija wut Dios pejjamechan, japi jiw matabijaxael isliajwa puexa pachaempoxan.

4 Xam to'ax jiw naewuajnalijwam Dios pejjamechan japon pijaxtat, Jesucristo pijaxtatbej. Jesucristo pejme pask wut, japon kaenanula ampathatpijiw tato'laxael. Jumchiyaxaelbejpon kaenanula jiw chajia tumpulijwabej: “Xam Dios kastikaxael, nejbu'wujajan xot” —chiyaxaelon tumpulijwa. O, jumchiyaxaelbejpon: “Xam Dios kastikaxil, nejbu'wujajan ajil xot” —chiyaxael Jesucristo. **2** Samata, jasew jiw naewuajande Jesús pejuwajan! Jiw naewet wut, japi jiw naewuajande! Nejxasinkael wutbejpi xam naewuajnampox, jnakiowa naewuajande! jNaewuajande japi jiw kaenanula pajut chiekal nejchaxoelalijwa: “Ampawuajan diachwujnakolax. Samata, xanbej naexaxisaxaelen” —chilijwapi, pajut nejchaxoel wut! Japi babijaxan is wut, jfia'e! jTo'im naexaxislijwapi Dios pejjamechan! Naewuajnam wut, jnabej buxkofe! jNakiowa naewuajnafulde! **3** Asamatkoi jiw nejweslaxael naeweslijwa diachwujnakolaxwujajan. Japi wulwekaxael asew jiw naewuajnalijwas asawuajan, naewesasiawuajan. **4** Nejweslaxaeli naeweslijwa diachwujnakolaxpox. Japi naewesaxael puexa nejmachwujajan, asew naewuajanpoxan, jiw pajut faekwujajan. **5** jXamlax nabej tapae' japi jiw naekichachajbalijwa! jNaexaxisfulde diachwujnakolaxpox! jJapawuajan asew jiwbej naewuajnafulde! Cristolijwa nabijatam wut, jboejtaliasfulde! jJiw naewuajnafulde chimiawuajan, Jesús pejuwajan, japi Dios bu'welijwas! jChiekal puexa isde Dios xam tato'alpoxan!

6 Tajmatkoi moxlisox asew jiw xan naboesalijwa, naewuajnafulax xot wajpaklon Jesús pejuwajan. **7** Me-ama aton xabich najaet puexa pejpamamaxtat premio kanalijwa, xanbej ja-an. Dios tanbistax wut, puexa tajpamamaxtat chiekal nabistax. Bichax toetx, isxpox, Dios nato'apox. Xan jiw naewuajnax diachwujnakolaxpox, me-ama Dios nato'a. **8** Amwutjel Dios naxawujnawet corona xan nachaxduslijwa. Wajpaklon Jesucristo, japon juez, xabich pachaempon. Japon asamatkoi xan najumchiyaxael: “Xam chiekal nabistam xanlijwa” —chiyaxaelon. Do jawut, nachaxdusaxaelon corona. Jawut xan kaenan japon nachaxdusaxil corona. Puexa asew jiwbej kaenanula chaxduiyaxaes corona. Japi jiw, nejxasinkpi Cristo, wujnawetibej japon pejme paslijwapox.

Pablo wullalapox Timoteo

9 Timoteo, xam kamta fulaesiam wut, jxabua'tlejno xan nataelijwam! **10** Japon Demas, xanxot chijia wut,

fulaechon Tesalónica paklowax poxade, kaes nejxasink xoton ampathatpijaxon. Crescente to'ax japon naewuajnalijwa Jesús pejwuajan Galacia tuajnujijiw. Tito to'axbej japon Jesús pejwuajan naewuajnalijwa Dalmacia tuajnujijiw. **11** Lucas, japon kaen, naman xanxot. Samata, iwulwekde Marcos! Faenam wut, iwapon buflaeman xanlel! Japon xan nakajachawaesaxael Dios pijax bichax. **12** Tíquico to'ax Éfeso paklowax poxade. **13** Xam fulaeman wut, inawexalaemno tajax, thuch naxoelxpo! Japox Troas paklowaxxot waeltax, Carpo pejbaxot. ¡Nawexalaemanbej tejew libros, asa-uafbej, xakoeyasi! Japapel-uaf xabich xan nawewe'p.

14 Alejandro, anaeltat nejmach-isan, japon babijaxan is xanlijwa. Samata, japon asamatkoi Dios kastikaxaes, japoxan is xoton xanlijwa. **15** ¡Xam chiekal taem Alejandrolijwa! Japon xabich nejwesla xatis naewuajnaspo.

16 Roma paklowaxxotx wut, tadaelmajiw natasala wut paklochow pejwuajnalel, xan jumnotx wut, tajut chiekal jum-an: “Diachwuajnakolaxa-el japi xan natasalapox” —an xan japi paklochowlijwa. Jawut asan aton chinax asalel jumchi-el xan nakajachawaeslijwa. Puexa tajnachala asbuan jumch tamach nawaelti. Xan japilijwa Dios kawuajntax Dios kastikasamatas. **17** Tajnachala tamach nawaelt wut, Dios nakajachawaet tadaelmajiw naboesa-elalijwa. Dios nakajachawaetbej mamnikalijwan naewuajnalijwan chimiawuajan, Jesús pejwuajan, puexa jaxotpijiw, judíos-elpi. **18** Dios nakajachawaesaxael, asew babijaxan is wut xanlijwa. Dios nabuflaeyaxaelbej japon tato'alxotse. Samata, xatis Dioslijwa pomatkoicha jumchiyaxaes: “¡Xam xabich pachaemam!” —chiyaxaes. ¡Jasox nej ja-aeche' Dioslijwa!

Pablo saludos xato'apox asew jiwlijwa

19 ¡Nawesaludam Aquila, japon pijowbej, Prisca! ¡Nawesaludambej Onesíforo pejjiw! **20** Erasto kaweta naman Corinto paklowaxxot. Trófimo bu'xaenk xot, namanax to'ax Mileto paklowaxxot. **21** ¡Kamtalejen fulaemno paslijwam iama wuajna! Saludos xato'api xamlijwa ampilape, Eubulo, Pudente, Lino, Claudiabej, puexa asew jiw, Jesús pejwuajan naexasitibej.

22 Xan Dios kawuajntax Jesucristo xam chalalijwa. Xan Dios kawuajntaxbej puexa xamal kajachawaeslijwapon.